



ワ 4
6348
5



門74
號6348
卷5

經庫

三國會要卷十四

黃巖楊晨纂

樂

漢末大亂衆樂淪缺魏武平荊州獲杜夔善八音嘗爲

漢雅樂郎尤悉樂事於是以為軍謀祭酒使創定雅樂

魏書太祖造新詩被之管弦皆成樂章漢鑄鐘工柴

玉巧思爲時見知夔令玉鑄銅鐘其聲均清濁多不如

意數毀改作玉厭之謂夔清濁任意白於太時又有散

祖太祖取鍾雜錯更試然後知夔精而玉妄騎侍郎鄧靜尹商善詠雅樂歌師尹胡能歌宗廟郊祀

之曲舞師馮肅服養曉知先代諸舞夔悉總領之晉志荀勗

以夔所制律呂檢校大樂八音與律乖錯始知尺度長

古四分有餘夔依爲律呂故致失韻隋書律厯志夔

三國會要

卷十四 樂

一

八八

昭和十二年
十一月十日
購

三國會要 卷十四
制律呂呂之候氣灰悉不飛遠詳經籍近采故事考會
劉覲云夔不識旋宮之義
古樂始設軒懸鍾磬而黃初中柴玉左延年之徒復以
新聲被寵改其聲韻

杜夔傳舊雅樂四曲一曰鹿鳴二曰騶虞三曰伐檀
四曰文王皆古聲詞太和中左延年改夔騶虞伐檀
文王三曲更自作聲節其名雖存而聲實異唯因夔
鹿鳴不改每正旦大會大尉奉璧羣后行禮東箱雅
樂常宋志作者是也後又改三篇之行禮詩第一曰
於赫篇詠武帝聲節與古鹿鳴同第二曰巍巍篇詠

文帝用延年所改騶虞聲三曰洋洋篇詠明帝用延
年所改文王聲第四曰復用鹿鳴鹿鳴之聲重用而
除古伐檀晉志荀勗曰魏氏行禮食舉再取周詩鹿鳴
以爲樂章鹿鳴以宴嘉賓無取于朝又以魏歌詩或
二言或三言或四言或五言與古詩不類以問司律
中郎將陳頎頎曰被之金石未必皆當張華以爲魏
上壽食舉詩及漢所施用其文句長短不齊未皆合
古蓋以依詠弦節本有因循而識樂知音足以制聲
度曲法用率非凡近之所能改二代三京襲而不變

八八

八八

雖詩章詞異興廢隨時至其韻逗曲折皆繫於舊有由然也是以一皆因就不敢有所改易此華勛所明異旨也

黃初二年改巴渝舞曰昭武舞改宗廟安世樂曰正始

樂嘉至樂曰迎靈樂武德樂曰武頌樂昭容樂曰昭業

樂雲翹舞曰鳳翔舞其衆歌詩多即前代之舊惟魏國

初建使王粲改作登歌及安世巴渝詩而已

陳暘樂書蕭子顯

曰魏辭不見疑用漢辭又漢巴渝舞四篇王粲更造其述魏德特行辭一篇而已用之郊廟豈足形容功德告

于神明宋志作俞兒舞

晉志舞曲有矛渝弩渝安臺行辭本歌曲四篇莫能

曉其句度魏初使王粲改創其辭粲問巴渝帥李管

种王歌曲意使歌聽之以考按歌曲而為之改為新

福歌曲以述魏德

太和初詔樂官如故為太樂有司奏武皇帝為太祖樂

用武始之舞文皇帝為高祖樂用咸熙之舞帝為烈祖

謹制樂舞名章斌之舞三舞總名大鈞之樂今有事於

天地宗廟宜竝以為薦享及臨朝大享亦宜舞之祀園

丘以下武始舞者平冕黑介幘玄衣裳白領袖絳領袖



中衣絳合幅袴絳絺黑韋鞮咸熙舞者冠委貌其餘服如前章斌舞者與武始咸熙舞者同服奏於朝廷則武始舞者武冠赤介幘生絳服單衣絳領袖阜領袖中衣虎文畫合幅袴白布絺黑韋鞮咸熙舞者進賢冠黑介幘生黃袍單衣白合幅袴其餘服如前奏可史臣案武始咸熙二舞冠制不同而云章斌與之同服不知服何冠也

晉書皆舞羽籥

侍中繆襲奏王粲所作登歌安世詩專以思詠神靈及說鑒享之意省讀漢安世歌亦無后妃風化天下之言

往謂房中為后妃之歌者恐失其意宜依事名樂改安世歌曰享神歌奏可又奏文昭皇后廟置四懸之樂當銘顯其均奏次第依太祖廟之名號曰昭廟之具樂尙書奏曰禮婦人繼夫之爵同牢配食者樂不異文昭皇后今雖別廟至於宮縣樂器音均宜如襲議奏可王肅議曰禮天子宮縣舞八佾今祀員丘方澤宜以天子制設宮縣之樂八佾之舞奏可又曰周禮賓客皆作備樂左傳王子頹享五大夫樂及徧舞六代之樂也天地宗廟事之大者賓客宴會比之為細說者以周祀天唯舞



雲門祭地唯舞咸池宗廟唯舞大武似失其義又韎師掌教韎樂祭祀則帥其屬而舞之大享亦如之鞀屨氏掌四夷之樂與其聲歌祭祀則次而歌之燕亦如之四夷之樂乃入宗廟先代之典獨不得用大享及燕日如之者明古今之樂皆主之宗廟而後播及其餘也高皇太皇帝太祖高祖文昭皆宜兼用先代及武始大鈞之舞奏可

繆襲議奏黃鍾舞文始以禮天地奏大簇舞大武以祀五郊明堂奏姑洗舞武德巡狩以祭四望山川奏蕤賓

舞武始大鈞以祀宗廟及二至祀丘澤祭可兼舞四代

又漢有雲翹育命之舞舊制以祀天今可兼以雲翹祀

圓丘育命祀方澤祀天地宜宮縣如延年議

通典

後漢正旦天子臨德陽殿受朝賀奏食舉之樂樂畢作

魚龍曼延魏猶有夏育扛鼎巨象行乳神龜抃舞背負

靈岳桂樹白雪畫地成川之樂

鞀舞漢施於燕享曹植鞀舞歌序曰靈帝西園故事

二字

玉海作有李堅者能鞀舞遭世荒亂又古曲多誤異代

未必相襲故依前曲作新歌五篇以成下國之陋樂

鐸舞傳元代魏辭云振鐸鳴金

巾舞者公莫舞也伏滔云項莊舞劍項伯紆袖以扞其

鋒魏晉傳為舞

隋志有鞞鐸巾拂四舞

槃舞漢曲至晉加以杯王粲云七槃陳於廣庭

通考

鼓角橫吹曲律書樂圖曰橫吹胡樂也李延年因之更

造新聲二十八解以為武樂魏後不復存陳暘樂書曰

胡角本應胡笳之聲通長鳴中鳴凡有三部其制並五

采衣幡掌畫蛟龍五采脚

晉志魏武征烏丸越沙漠而軍士思歸於是減為中鳴而

更悲矣按軍中用鼓吹魏世給鼓吹甚輕牙門督將五校悉有鼓吹

杜夔所用調律尺比荀勖尺得一尺四分七釐魏景元

四年劉徽注九章云劉歆斛尺弱於今尺四分五釐比

魏尺其斛深九寸五分五釐徑一尺三寸六分八釐七

豪又曰當今大司農斛圓徑一尺三寸五分五釐深一

尺積一千四百四十一寸十分寸之三魏斛大而尺長

王莽斛小而尺短也

晉志按通志言杜夔造斛依周嘉量深尺方尺實一斛其臂一寸實

一豆其耳三寸實一升其重一鈞聲中黃鍾

太始十年御府出銅竹律二十五具其三具與杜夔及

左延年律法同其二十二具視其銘題尺寸是笛律也

問列和言魏明帝時作此志明帝令和以歌聲濁者用

長笛長律歌聲清者用短笛短律通考和詞工人裁

時聲濁者用三尺二笛聲清者用二尺九笛漢魏相傳皆然荀勖以為俗而不典

魏晉之世有孫氏善歌舊曲宋識善擊節倡和陳左善

清歌列和善吹笛郝索善彈箏朱生善琵琶尤發新聲

按傅子云朱生善彈琴琵琶又索作素

相和漢舊歌也絲竹更相和執節者歌本一部魏明帝

分為二更遞夜宿本十七曲朱生宋識列和等復合之

為十三曲

但歌四曲出自漢世無弦節作伎最先唱一人唱三宋志

作二人和魏武帝尤好之時有宋容華者善唱此曲當時

特妙

前世樂飲酒酣必起自舞魏晉以來尤重以舞相屬所

屬者代起舞

相和 駕六龍氣出倡 厥初生精列 天地閒度

山武 帝 登山有遠望十五 惟漢二十二世龔露

關東有義士蒿里 對酒歌太平時對酒 棄故鄉

陌上桑 駕虹蜺陌上桑

文帝 武帝

清商三調歌詩 平調 周西短歌行 秋風燕歌行

帝 仰瞻短歌行 別日燕歌行 對酒短歌行

清調晨上秋胡行 北上苦寒行 願登秋胡行

蒲生塘上行 悠悠苦寒行 瑟調 朝日善哉行

上山善哉行 朝游善哉行 古公善哉行 自

惜善哉行 我祖善哉行 赫赫善哉行

大曲 西山折楊柳 園桃煌煌京洛 碣石步出

行武 置酒野田黃雀 為樂滿歌 夏門步出

日隴西 王者布大化懼歌行

楚調怨詩 明月東阿王

陳思王鼙舞歌五篇 聖皇篇當章和二年中 靈芝篇當殿

前生 桂樹 大魏篇當漢吉昌 精微篇當關中有賢女 孟冬篇當狡

免 魏鼙舞歌五篇 明明魏皇帝 大和有聖帝

魏麻長 天生烝民 為君既不易

魏鼓吹曲十二篇 繆襲造

漢第一曲朱鷺今第一曲初之平言魏也

初之平 義兵征 神武奮 金鼓鳴 邁武德 揚

洪名 漢室微 社稷傾 皇道失 桓與靈 闔官

熾 羣雄爭 邊韓起 亂金城 中國擾 無紀經
 赫武皇 起旗旌 麾天下 天下平 濟九州
 九州寧 勦武功 武功成 越五帝 邇三王 興
 禮樂 定紀綱 普日月 齊暉光

右初之平曲凡三十句句三字

漢第二曲思悲翁今第二曲戰滎陽言曹公也

戰滎陽 汴水陂 戎士憤怒 貫甲馳 陳未成
 退徐榮 二萬騎 塹壘平 戎馬傷 六軍驚 勢
 不集 衆幾傾 白日沒 時晦冥 顧中牟 心屏

營 同盟疑 計無成 賴我武皇 萬國寧

右戰滎陽曲凡二十句其十八句句三字二句句
 四字

漢第三曲艾如張今第三曲獲呂布言曹公東圍臨淮
 生擒呂布也

獲呂布 戮陳宮 芟夷鯨鯢 驅騁英雄 囊括天
 下 運掌中

右獲呂布曲凡六句其三句句三字三句句四字
 漢第四曲上之迴今第四曲克官渡言曹公與袁紹戰

破之於官渡也

克紹官渡 由白馬 僵尸流血 破原野 賊衆如

犬羊 王師尙寡 沙塹傍 風飛揚 轉戰不利

士卒傷 今日不勝 後何望 土山地道 不可當

卒勝大捷 震冀方 屠城破邑 神武遂章

右克官渡曲凡十八句其八句句三字一句句五

字九句句四字

漢第五曲翁離今第五曲舊邦言曹公勝袁紹於官渡
還謙收藏士卒死亾也

舊邦蕭條 心傷悲 孤魂翩翩 當何依 游士戀

故 涕如摧 兵起事大 今願違 博求親戚 在

者誰 立廟置後 魂來歸

右舊邦曲凡十二句其六句句三字六句句四字

漢第六曲戰城南今第六曲定武功言曹公初破鄴武

功之定始乎此也

定武功 濟黃河 河水湯湯 旦暮有橫流波 袁

氏欲衰 兄弟尋干戈 決漳水 水流滂沱 營城

中如流魚 誰能復顧室家 計窮慮盡 求來連和

和不時 心中憂戚 賊衆內潰 君臣奔北 拔
鄴城 奄有魏國 王業艱難 覽觀古今 可爲長
歎

右定武功曲凡二十一 句其五句句三字三句句
六字十二句句四字一句句五字

漢第七曲巫山高今第七曲屠柳城言曹公越北塞歷
白檀破三郡烏桓於柳城也

屠柳城 功誠難 越度隴塞 路漫漫 北踰岡平
但聞悲風正酸 蹋頓授首 遂登白狼山 神武

愁海外 永無北顧患

右屠柳城曲凡十句其三句句三字三句句四字
三句句五字一句句六字

漢第八曲上陵今第八曲平南荆言曹公南平荆州也
南荆何遼遼 江漢濁不清 菁茅久不貢 王師赫

南征 劉琮據襄陽 賊備屯樊城 六軍廬新野
金鼓振天庭 劉子面縛至 武皇許其成 許與其

成 撫其民 陶陶江漢間 普爲大魏臣 大魏臣
向風思自新 思自新 齊功古人 在昔唐與虞

大魏得與均 多選忠義士 爲喉唇 天下一定
萬世無風塵

右平南荆曲凡二十四句其十七句句五字四句
句三字三句句四字

漢第九曲將進酒今第九曲平關中言曹公征馬超定
關中也

平關中 路向潼 濟濁水 立高墉 鬪韓馬 離
羣凶 選驍騎 縱兩翼 虜崩潰 級萬億
右平關中曲凡十句句三字

漢第十曲有所思今第十曲應帝期言魏文帝以聖德
受命應運期也

應帝期 於昭我文皇 麻數承天序 龍飛自許昌
聰明昭四表 恩德動遐方 星辰爲垂耀 日月
爲重光 河洛吐符瑞 草木挺嘉祥 麒麟步郊野
黃龍游津梁 白虎依山林 鳳凰鳴高岡 考圖
定篇籍 功配上古義皇 義皇無遺文 仁聖相因
循 期運三千歲 一生明聖君 堯授舜萬國 萬
國皆附親 四門皆穆穆 教化常如神 大魏興盛

與之爲鄰

右應帝期曲凡二十六句其一句三字二句四字
二十二句句五字一句六字

漢第十一曲芳樹今第十一曲邕熙言今魏氏臨其國
君臣邕穆庶績咸熙也

邕熙 君臣念德 天下治 登帝道 獲瑞寶 頌

聲竝作 洋洋浩浩 吉星臨高堂 置酒列名倡

歌聲一何紆餘 雜笙簧 八音諧 有紀綱 子孫

永建萬國 壽考樂無央

右邕熙曲凡十五句其六句句三字三句句四字
一句二字三句句五字二句句六字

漢第十二曲上邪今第十二曲太和言魏明帝繼體承
統太和改元德澤流布

惟太和元年 皇帝踐阼 聖且仁 德澤爲流布

災蝗一時爲絕息 上天時雨露 五穀溢田疇 四

民相率遵軌度 事務激清 天下獄訟察以情 元

首明 魏家如此 那得不太平

右太和曲凡十三句其二句句三字五句句五字

三句句四字三句句七字

漢享宴食舉樂十三曲與魏代鼓吹長簫短簫伎錄並云絲竹合作執節者歌

漢故事上壽四會曲注言但有鍾鼓而無歌詩魏初作四會有琴筑但無詩雅樂郎杜瓊云明帝青龍二年以長笛食舉第十二古置酒曲代四會又易古詩名曰羽觴行用為上壽曲施用最在前鹿鳴以下十二曲名食舉樂而四會之曲遂廢

通典
玉海

漢魏以來有四箱金石之樂其架少則或八或六多則

十六二十

陳暘
樂書

唐會要張濬奏云宮懸之制陳罇鍾十二架當十二辰位甲丙庚壬各設編鍾一架乙丁辛癸各設編磬一架合十二架建鼓四隅當乾坤艮巽位以象二十四氣宗廟殿廷皆用此制漢魏晉宋齊六朝並用二十架

魏都賦劉逵注云文昌殿前有鍾簾銘曰惟魏四年歲在丙申龍次大火五月丙寅作蕤賓鍾無射鍾建安二十一年七月始設鍾簾於文昌殿前

何承天曰世咸傳吳朝無雅樂或云今之神絃孫氏以爲宗廟登歌案陸機孫權誅肆夏在廟雲翹承機不容虛設此言又韋昭孫休世上鼓吹饒歌十二曲表曰當付樂官善歌者習歌然則吳非無樂官善歌者乃能以歌辭被絲管窻容止以神絃爲廟樂而已乎

吳鼓吹曲十二篇 韋昭造

炎精缺者言漢室衰武烈皇帝奮迅猛志念在匡救然而王迹始乎此也漢曲有朱鷺此篇當之第一

炎精缺 漢道微 皇綱弛 政德違 衆姦熾 民

罔依 赫武烈 越龍飛 陟天衢 耀靈威 鳴雷

鼓 抗電麾 撫乾衡 鎮地機 厲虎旅 騁熊羆

發神聽 吐英奇 張角破 邊韓羈 宛穎平

南土綏 神武章 渥澤施 金聲震 仁風馳 顯

高門 啟皇基 統罔極 垂將來

右炎精缺曲凡三十句句三字

漢之季者武烈皇帝悼漢之微痛卓之亂興兵奮擊功蓋海內也漢曲有思悲翁此篇當之第二

漢之季 董卓亂 桓桓武烈 應時運 義兵興

雲旗建 厲六師 羅八陣 飛鳴鏑 接白刃 輕
騎發 介士奮 醜虜震 使眾散 劫漢主 遷西
館 雄豪怒 元惡償 赫赫皇祖 功名聞

右漢之季曲凡二十句其十八句句三字二句句
四字

攄武師者言大皇帝卒武烈之業而奮征也漢曲有艾
如張此篇當之第三

攄武師 斬黃祖 捕夷凶族 革平西夏 炎炎大
烈 震天下

右攄武師曲凡六句其三句句三字三句句四字
烏林者言曹操既破荊州從流東下欲來爭鋒大皇帝
命將周瑜逆擊之於烏林而破走也漢曲有上之回此
篇當之第四

曹操北伐 拔柳城 乘勝席卷 遂南征 劉氏不
睦 入郡震驚 眾既降 操屠荆 舟車十萬 揚
風聲 議者狐疑 慮無成 賴我大皇 發聖明
虎臣雄烈 周與程 破操烏林 顯章功名

右伐烏林曲凡十八句其十句句四字八句句三

字

秋風者言大皇帝說以使民民忘其死漢曲有攤離此篇當之第五

秋風揚沙塵 寒露霑衣裳 角弓持弦急 鳩鳥化為鷹 邊垂飛羽檄 寇賊侵界疆 跨馬披介冑 愴慨懷悲傷 辭親向長路 安知存與亡 窮達固有分 志士思立功 思立功 邀之戰場 身逸獲高賞 身沒有遺封

右秋風曲凡十六句其十四句句五字二句四字

一句三字

克皖城者言曹操志圖并兼而令朱光為廬江太守上親征光破之於皖城也漢曲有戰城南此篇當之第六
克滅皖城 遏寇賊 惡此凶孽 阻姦慝 王師赫征 眾傾覆 除穢去暴 戢兵革 民得就農 邊境息 誅君弔臣 昭至德

右克皖城曲凡十二句其六句句三字六句句四字

關背德者言蜀將關羽背棄吳德心懷不軌大皇帝引

師浮江而禽之也漢曲有巫山高此篇當之第七

關背德 作鷓鴣張 割我邑城 圖不祥 稱兵北伐

圍樊襄陽 營臂大於股 將受其殃 魏夫吳聖

主 叡德與元通 與元通 親任呂蒙 泛舟洪汜

地 源涉長江 神武一何桓桓 聲烈正與風翔

歷撫江安城 大據郢邦 虜羽授首 百蠻咸來同

盛哉三五比隆

右關背德曲凡二十一句其八句句四字二句句

六字七句句五字四句句三字

通荆門者言大皇帝與蜀交好齊盟中有關羽自失之愆戎變樂亂生變作患蜀疑其眩吳惡其詐乃大治兵終復初好也漢曲有上陵此篇當之第八

荆門限巫山 高峻與雲連 蠻夷阻其險 歷世懷

不賓 漢王據蜀郡 崇好結和親 乖微中情疑

讒夫亂其間 大皇赫斯怒 虎臣勇氣震 蕩滌幽

藪 討不恭 觀兵揚炎耀 厲鋒整封疆 整封疆

闡揚威武容 功赫戲 洪烈炳章 邈矣帝皇世

聖吳同厥風 荒裔望清化 化恢宏 煌煌大吳

延祚永未央

右通荆門曲凡二十四句其十七句句五字四句句三字三句句四字

章洪德者言大皇帝章其大德而遠方來附也漢曲有將進酒此篇當之第九

章洪德 邁威神 威殊風 懷遠鄰 平南裔 齊海濱 越裳貢 扶南臣 珍貨充庭 所見日新

右章洪德曲凡十句其八句句三字二句句四字從麻數者言大皇帝從籙圖之符而建大號也漢曲有

有所思此篇當之第十

從麻數 於穆我皇帝 聖哲受之天 神明表奇異

建號勗皇基 聰叡協神思 德澤浸及昆蟲 浩

蕩越前代 三光顯精耀 陰陽稱至治 肉角步郊

畛 鳳皇棲靈囿 神龜游沼池 圖讖摹文字 黃

龍觀鱗 符祥日月記 覽往以察今 我皇多 事

上欽昊天象 下副萬民意 光被彌蒼生 家戶

蒙惠賚 風教肅以平 頌聲章嘉喜 大吳興隆

綽有餘裕

右從麻數曲凡二十六句其一句三字三句句四
字二十二句句五字一句六字

承天命者言上以聖德踐阼道化至盛也漢曲有芳樹
此篇當之第十一

承天命 於昭聖德 三精垂象 符靈表德 巨石
立 九穗植 龍金其鱗 烏赤其色 輿人歌 億
夫歎息 超龍升 襲帝服 躬瀆懿 體元嘿 夙
興臨朝 勞謙日昊 易簡以崇仁 放遠讒與慝
舉賢才 親近有德 均田疇 茂稼穡 審法令

定品式 考功能 明黜陟 人思自盡 惟心與力
家國治 王道直 思我帝王 壽萬億 長保天
祿 祚無極

右承天命曲凡三十四句其十九句句三字二句
句五字十三句句四字

玄化者言上修文訓武則天而行仁澤流洽天下喜樂
也漢曲有上邪此篇當之第十二

玄化象以天 陛下聖真 張皇網 率道以安民
惠澤宣流而雲布 上下睦親 君臣酣宴樂 激發

弦歌揚妙新 修文籌廟勝 須時備駕巡洛津 康
哉泰 四海歡忻 越與三五鄰

右玄化曲凡十三句其五句句五字二句句三字
三句句四字三句句七字

晉志曰拂舞出自江左舊云吳辭檢其歌非也楊泓序
曰自到江南見白符舞或言白鳧鳩舞察其辭旨乃吳
人患孫皓虐政思屬晉也其曲有白鳩濟濟獨祿碣石
淮南王五篇其辭過魏晉諸公所作遠甚但失之悽楚
非治世之音耳 通鑑注

賀齊被命詣所在及當還郡權出祖道作樂舞象 吳書曰殊
俗貢珍狡獸率舞

輩復試試通亦敘用典通

正始中劉靖上疏宜高選博士掌教國子依古法使二千石以上子孫年十五皆入太學明制黜陟榮辱之路不從

賀循曰魏氏故事擇朝臣一人經學最優者領之不繫位之高下

東晉時車胤言漢博士惟舉明經之士選轉各以本資初無定班魏及中朝西晉多以侍中常侍儒學最優者領之典通

魏齊王正始二年帝講論語通五年講尚書通七年講禮記通並使太常釋奠以太牢祀孔子於辟雍以顏回配

魏高貴鄉公甘露二年天子親帥羣司行養老之禮於太學命王祥為三老鄭小同為五更祥南面几杖以師道自居天子北面乞言祥陳明王聖帝君臣政化之要以訓之聞者莫不砥厲此通志約祥所言為文見魏志注

譙周五經然否曰漢初或云三老答天子拜遭王莽亂法度殘缺漢中興定禮儀羣臣欲令三老答拜董

鈞駁曰養三老所以教事父之禮也若答拜是使父下答子拜也詔從之譙周論之曰禮口服上服猶以非親之故答子拜士見異國君亦答士拜是不得視猶子也虞喜曰漢儀於門屏交禮交禮卽答拜矣中興謬從鈞議後已革之甚得禮意

通志續漢志注

晉潘尼釋奠頌曰輿駕次於太學太傅在前少傅在後宮臣畢從三率備衛乃掃壇爲殿縣幕爲宮夫子位於西序顏回侍於北墉宗伯掌禮司儀辨位二學儒官搢紳先生之徒皆端委而陪於堂下設樽篚於

兩楹之間陳罍洗於阼階之左又曰牲饋之事終享獻之禮畢釋元衣御春服天子乃命內外羣司百辟卿士蕃王三事至於學徒國子咸來觀禮我后皆延而與之燕金石簫管之音八佾六代之舞

建安八年令郡國各修文學縣滿五百戶置校官選其鄉之俊造而教學之

魏嘉平中武威太守條茂起學館築雙闕於靈淵池

上晉書張軌傳水經注

蔣濟奏太學堂上官爲置鼓凡學受業皆須十五以上

公卿大夫子弟在學者以年齒長幼相次不得以父兄位也學者不恭肅慢師酗酒好訟罰飲水三升

按潘岳閑居賦云兩學齊列雙宇如一右延國胄左納良逸是二學並建水經注云漢魏置太學於國子

堂東

文選注引陸機洛陽記辟雍在靈臺東相去一里俱魏武所徙 御覽引晉尚書大事曰按洛陽圖宮自太學國子辟雍不相預也是 漢魏之世初自兩立至釋奠在辟雍

青龍四年置崇文觀徵善屬文者以充之

明帝詔曰先帝著典論不朽之格言其刊石於廟門之外及太學與石經並永示來世

水經注正始中立古篆隸三字石經於堂西國

子堂也漢石經在東石長八尺廣四尺四十八枚又典論六碑附於其次衛恆四體書勢正始立三字石經轉失滄法則以爲滄書者非

六年詔故司徒王朗所作易傳令學者得以課試

正元二年九月講尚書畢賜執經親授者各有差

甘露元年二月丙辰宴羣臣於太極東堂與侍中尚書

等講述禮典

魏氏春秋

四月丙辰幸太學講易畢復講尚書禮記

帝常與司馬望王沈裴秀鍾會等講宴於東堂并屬文論名秀爲儒林文人沈爲文籍先生望會亦各有名號

帝性急請召欲速以望在外特給追鋒車虎賁卒五人

每有集會望輒奔馳而至注引晉諸公贊

甘露二年五月帝幸辟雍會命羣臣賦詩侍中和道尙

書陳騫等作詩稽留有司奏免官詔曰吾以暗昧愛好

文雅廣延詩賦以知得失而乃爾紛紜良用反仄其原

道等主者宜敕自今羣臣皆當玩習古義修明經典稱

朕意焉

顏氏家訓孫叔然創爾雅音義是漢末人獨知反語至

於魏世此事大行按孫炎受業鄭康成門人隋志孫炎禮記注玉海引張說奏魏徵類禮曰

炎始改舊本以類相從先儒所非皆不行用附

文帝紀使諸儒撰集經傳隨類相從凡千餘篇號曰皇

覽時劉劭王象皆奉詔撰見劭傳及楊俊傳注魏畧象領祕書監從延康元年始撰數歲藏於祕府合四

十餘部部有數十篇通合八百餘萬字

鄭冲與孫邕曹羲荀顗何晏共成論語集解奏之晉書冲傳

王肅傳善賈馬之學而不好鄭氏采會同異爲尙書詩

論語三禮左氏解及撰定父朗所作易傳皆列於學官

其所論駁朝廷典制郊祀宗廟喪紀輕重凡百餘篇王基

傳云肅改易鄭元舊說而基持元義常與抗衡又肅集聖證論以譏鄭元孫炎駁而釋之

魏畧黃初元年之後乃始掃除太學之灰炭補舊石牌之缺壞備博士之員錄依漢甲乙以考課申告州郡有欲學者遣詣太學太學始開有弟子數百人至太和青龍中中外多事人懷避就雖性非解學多求詣太學諸生有千數而諸博士率皆粗疏無以教子弟弟子本以避役竟無能習學冬來春去歲歲如是又雖有精者而臺閣舉格太高加不念統其大義而問字指墨法點注之間百人同試度者未十是以志學之士遂復陵遲而浮虛者競逐也

王肅傳注 劉馥傳靖言博士選輕諸生避役高門子弟恥非其倫故無學者

晉徐邈傳自魏以來多使微人教授號為博士不復尊以為師

二十八

黃初時徵拜博士十餘人學多褊又不熟悉唯樂詳五業並授其或難質不解詳無愠色以杖畫地牽譬引類至忘寢食冊嚴幹善春秋公羊司隸鍾繇不好公羊而好左氏謂左氏為大官公羊為賣餅家故數與幹辯長短繇為人機捷善持論而幹呐口臨時屈無以應繇曰公羊高為左邱明服矣幹曰直故吏為明使君服耳公羊未肯也冊

司馬朗傳十二試經為童子郎監試以其壯大疑朗匿

年劾問朗曰朗之內外累世長大損年以求早成非志所為

高柔傳太祖在撥亂之際並使郡縣立教學之官高祖興復辟雍州立課試於是天下復開庠序之教親俎豆之禮今博士皆一國清選而遷除限不過長非所以崇儒術勵怠惰也以爲博士宜隨學行優劣待以不次之位以勸學者

高堂隆傳景初中帝以蘇林秦靜等並老恐無能傳業者乃詔科郎吏高才解經義者三十人從隆林靜分受

四經三禮主者爲設課試之法數年隆等皆卒學者遂廢

管輅別傳爲北冀文學

時爲冀州文學從事

趙孔曜就郡冀上與

輅相見又曰父爲琅邪卽邱長於時冀上有遠方及國

內諸生四百餘人

按此則學者甚多且有他處人矣

蜀太學

晉書儒林傳文立巴郡人蜀時游太學專毛詩三禮華陽國志同

向朗傳潛心典籍孜孜不倦年踰八十猶手自校書刊定謬誤積聚篇卷於時最多開門接賓誘納後進但講論古義不干時事上自執政下及童冠皆敬重焉

許慈傳先主定蜀承喪亂麻紀學業衰廢乃鳩合典籍

沙汰眾學慈潛胡並為博士與孟光來敏等典掌舊文

光為議郎敏為典學校尉尹默為勸學從事又譙周為典學從事總州之學者

黃龍二年春詔立都講祭酒以教學諸子

孫休永安元年立學制曰古者建國立學為先宜按舊

制置學宮立五經博士加其寵祿見吏之中及將吏子

弟有志者各令就業一歲課試差其品第加以位賞而
未行也

孫瑜傳馬普篤學好古瑜厚禮之使二府奮威將軍領丹陽守將

吏子弟數百就受業遂立學官臨饗講肄是時諸將皆

以軍務為事而瑜好樂墳典雖在戎旅誦聲不絕弟奐亦愛

樂儒生復命部曲子弟就業後仕進朝廷者數十人

闕澤傳每朝廷大議經典所疑輒咨訪之以儒學勤勞

封都鄉侯

虞翻別傳翻立易注奏上又奏鄭元解尚書違失事因

云宜命學官定此三事又元所注五經違義尤甚者百

六十七事不可不定行乎學校傳乎將來臣竊恥之

三國會要卷十五終

Blank columns for text in the right page.

三國會要卷十六

黃巖楊晨纂

選舉

魏武令曰喪亂以來風教凋薄謗議之言難用褒貶自
建安以前一切勿論其以斷前誹議者以其罪罪之
劉矯

建安十五年令曰天下未定求賢之急時也若必廉士
而後可用則齊桓何以霸世今天下得無被褐懷玉而
釣於渭濱者乎又得無盜嫂受金而未遇無知者乎唯
才是舉吾得而用之

十九年令曰有行之士未必能進取進取之士未必能有行也士有偏短庸可廢乎有司明思此義則士無遺滯官無廢業矣

取文館詞林引作趣

二十二年令曰今天下得無有至德之人放在民間及果勇不顧臨敵力戰若文俗之吏高材異質或堪為將守負汗辱之名見笑之行或不仁不孝而有治國用兵之術其各舉所知勿有所遺

魏書

魏武選令曰諺曰失晨之雞思補更鳴昔季闡在白馬有受金取婢之罪棄而勿問後以為濟北相以其能故

令曰領長史王必是吾披荆棘時吏也故教辟之

延康元年令曰故尚書僕射毛玠奉常王修涼茂郎中

令袁渙少府謝奐方潛中尉徐奕國淵等皆忠直在朝

履蹈仁義並早即世而子孫陵遲惻然愍之其皆拜子

男為郎中

魏書

黃初二年初令郡國口滿十萬者歲察孝廉一人其有

異秀者無拘戶口

北堂書鈔引陳羣同歲論云初郡舉一人後積增益至六人也

三年詔曰今之計考古之貢士也十室之邑必有忠信

若限年然後取士是呂尚周晉不顯於前世也其令郡

國所選勿拘老幼儒通經術吏達文法到皆試用有司

糾故不以實者

通鑑注計孝上計吏及孝廉也魏舒郡舉上計掾察孝廉對策升第

四年五月有鵜鵠集靈芝池詔博舉天下儁德茂才獨

行君子

太和二年詔曰尊儒重學王教之本也自頃儒官或非

其人將何以宣明聖道其高選博士才任侍中中常侍

者十月詔公卿近臣舉良將各一人

四年詔曰世之質文隨教而變兵亂以來經學廢絕後

生進趣不由典謨豈訓導未洽將進用者不以德顯乎

其郎吏學通一經才任牧民博士課試擢其高第者亟

用其浮華不務道本者罷退之十二月詔公卿舉賢良

青龍元年詔公卿舉賢良篤行之士各一人

四年詔欲得有才智文章謀慮淵深者無限年齒勿拘

貴賤卿校以上各舉一人

魏文帝為魏王時三方鼎立士流播遷四民錯雜詳覈

無所

何夔傳言草創之際用人未詳其本宜先核之鄉閭

延康元年吏部尚書陳羣以選用不盡人才乃立九品官人之法州郡皆置中

正以定其選擇州郡之賢有識鑒者為之區別人物第

其高下又制郡口十萬以上歲察一人其有秀異不拘

戶口其武官之選俾護軍主之九品中正之法郡設小中正州設大中正司徒司

正品第人才以上大中中正大中正核實以上司徒司徒再核然後付尚書選用孫楚言班固序往代以九條而

陳羣依之以品生人傅子曰陳羣立九品之制郡置中正平次人才州置都而總其議應璩新論曰百郡立

中正九州置都士州置閭與郡縣希疎如馬齒生不相識面何緣別義禮北堂書鈔引多十室稱忠信觀過必黨

里二黃初三年始除漢限年之制令郡國貢舉勿拘老幼

幼儒通經術吏達文法則皆試用太和之後俗用浮靡

遞相標目夏侯諸葛何鄧之儔有四聰八達之稱帝深

嫉之於是士大夫有名聲者或禁錮廢黜以懲之作者

課之法考覈百官嘉平初司馬懿秉政詳求治本懿議諸中

正未能料究人才以為可除九品州置大中正曹議曰一州濶達訪不得知會復訪本郡先達此為問州

中正而實決於郡人唐書柳芳曰魏時州大中正主簿郡中正功曹皆取著姓士族為之以品藻人物權歸

右夏侯元曰夫官才用人國之柄也故銓衡專於臺閣

上之分也孝行存乎閭巷優劣任之鄉人下之敘也夫

欲清教審選在明其分敘不使相涉而已今令中正但

考行倫輩輩當行均斯可官矣行有大小比有高下則

所任之次亦別矣奚必使中正干銓衡之機於下而執

機柄者有所委仗於上下交侵以生紛錯哉且眾職

之屬各有官長但使官長各以其屬能否獻之臺閣則
據官長能否之第參以鄉閭德行之次擬其倫比勿使
偏頗中正則唯考其行迹別其高下審定輩類勿使升
降而總之於臺閣官長所第中正所輩擬比隨次率而
用之如其不稱責負在外內外相參得失有所庶可靜
風俗而審官才矣劉毅曰人物難知一也愛憎難防二也
實為奸府事名九品而有也情偽難明三也今立中正定九品
入損北堂書鈔廣文選

按九品之制因建安兵興衣冠士族多離本土欲徵
原流遽難委悉魏氏革命州郡俱置大小中正各以

本處人任諸府公卿及臺省郎吏有德充才盛者為
之區別所管人物定為九等其有言行修著則升進
之或以五升四以六升五倘或道禮虧缺則降下之
或自五退六自六退七矣晉書石季龍載記曰魏建
九品之制三年一清定之
是以吏部不能審覈天下人才士庶故委中正銓第
等級憑以補授謂免乖戾及法之弊也唯能知其闕
閱非復辨其賢愚上品無寒門下品無勢族所以劉
毅云魏因器亂是軍中權時之制非經久之典也至
隋方罷陳壽言之太畧故詳辨之按魏立中正本猶
鄉舉里選之意欲

觀素行尚存清議是以泰初所論惟恐侵權不言斯弊迨及末流乃重門資而已衛瓘言其始猶有鄉論餘風中間漸染遂計資定品惟以居位為貴

咸熙二年令諸郡中正以六條舉淹滯一曰忠恪匪躬二曰孝敬盡禮三曰友於兄弟四曰絜身勞謙五曰信義可復六曰學以為已

傅元曰魏武好法術而天下貴刑名魏文慕通達而天下賤守節其後綱維不振而虛無放誕之論盈於

朝野

晉書李含傳隴西狄道人轉秦國郎中令司徒選含

領始平中正秦王薨含依臺儀葬訖除器尚書奏含不應除本州大中正傳祇以名義貶含中丞傳咸上表理含曰含自以隴西人雖戶屬始平非所綜悉言於司徒不宜為中正又曰祇為州都欲隆風教中正龐騰貶品三等又曰帝不從遂被貶退割為五品燕國中正劉沈舉霍原先咨州大中正司徒府不從陳頽傳言河北何故少人士每以三品為中正則他處必用三品以上人物可知山濤亦在三品卞壺傳奏淮南小中正王式事請并免司徒組揚州

大中正燁淮南大中正宏可見上下隸屬之制又曰
詔特原組等式付鄉邑清議廢棄終身是本縣中正
得舉正之也

梁沈約曰都正俗士斟酌時宜品目少多隨事俯仰
又曰魏晉以來以貴役賤士庶之科較然有辨

唐李諤曰魏之三祖忽君人大道好雕蟲小藝連編
累牘獨有月露風雲而已世俗呂之相高朝廷以茲
擢人故文詞日繁其政日亂

魏元同曰漢掾史從事悉任州郡爰自魏晉始遣吏

部因循迄今

劉秩曰曹魏取士權歸著姓非尚賢之術蓋尊尊之
道

明帝詔曰選舉莫取有名名如畫地作餅不可啖也吏
部尚書盧毓對曰名不足以致異人而可以得常士常
士畏教慕善然後有名其後士人多務進取廉遜道缺
劉寔乃著崇讓論以矯之

言一官缺擇衆官所讓最多者用之

明帝時以士人稱毀是非混雜難別令劉劭作都官考
課之法七十二條考覈百官其畧欲使州郡考士必由

三國會要 卷十六
四科皆有事故然後察舉或辟公府為親民長吏轉以
功次補郡守者或就增秩賜爵杜畿滿寵田豫胡質等居郡或十餘年或二十年加秩假節至於公卿及內職大臣亦俱考之事下三
府是時大議考課之制杜恕上疏曰古有亂人而無亂
法若法可專任則唐虞不須稷契之佐殷周無貴伊呂
之輔矣今奏考功者陳周漢之云為掇京房之本旨可
謂明考課之要至於崇揖讓之風興濟濟之治臣以為
未盡善也後竟不行
卿攷課一曰掌建邦國以攷制治二曰九卿時敘以攷

事典三曰經綸國體以攷奏議四曰共屬眾職以攷總

攝五曰明慎用刑以攷留獄北堂書鈔引王昶攷課事

尚書侍中攷課一曰掌建六材以攷官人二曰綜理萬

幾以攷庶績三曰進視惟允以攷讜言四曰出納王命

以攷典政五曰罰法以攷典刑御覽引同上

雜錄

魏畧始制九品各使諸郡選置中正差敘公卿以下至
於郎吏功德材行所任馮翊郡移王嘉為中正嘉敘吉
茂雖在上第而狀甚下云德優能少

又曰時苗爲太官令領其郡中正定九品於敘人材不能寬大

晉陽秋曰陳羣爲吏部尙書制九格登用皆由於中正考之簿世然後授任

魏名臣奏曰羽林右監朱遺言天下之任非吏部尙書所能辦令長以下可專付吏郡守以上八座舉

袁子曰魏置吏部選天下百官夫用人人君之所司不可以假人者使治亂之柄制在一人之手權重而人才難居此職稱此才者未有一也

魏武集選舉令國家舊法選尙書郎取年未十五者使文筆眞草有才能謹慎典曹治事起草立義又以草呈示令僕訖乃付令史書之書訖共讀省內之事本來臺郎統之令史不行知也若郎不能爲文書當御令史是爲牽牛不可以服箱而當取辦於繭角也

魏名臣奏甄毅奏曰漢時公卿皆奏事選爲尙書郎試然後得爲之其在職自贖所發書詣天子前發省便處當事輕重口自決定或天子難問據案處正乃見郎之決斷才伎魏則不然今尙書郎皆天下之選才伎鋒出

三國會要 卷十六
欲聘其能於萬乘之前宜如故事令郎日自奏事自處當

許允爲吏部郎選郡守帝疑其所用非次允對某郡太守雖限滿文書先至年限在後某守雖後日限在前是選次有限期也

傅嘏傳劭考課論雖欲尋前代黜陟之文然其制度畧已闕忘魏承秦漢經邦治戎權法竝用百官羣司軍國通任隨時之宜以應政機以古施今事雜義殊難得而通也今九州之民及京城未有六鄉之舉其選才之職

專任吏部案品狀則才實未必當任簿伐則德行未爲敘如此則殿最之課未盡人才

王昶傳嘉平初詔使撰百官考課事昶以爲唐虞雖有黜陟而考課之法不垂周制冢宰又無校比之計由此言之聖主明於任賢畧舉黜陟之體以委達官之長而總其統紀故能否可得而知其指如此

管甯傳元年十一月被公車司馬令所下州郡八月甲申詔書徵臣 又自黃初至於青龍徵命相仍常以八月賜牛酒

廣平太守盧毓到官三日綱紀白承前版謁毓教曰張先生所謂上不事天子下不友諸侯者也豈此版謁所可光飾哉但遣主簿奉書致羊酒之禮

魏畧焦先竄何渚閒侯武陽語縣注籍給廩日五升

甘露二年詔曰玄菟郡高顯縣吏民反叛長鄭熙爲賊所殺民王簡負擔熙喪遠致本州忠節可嘉特拜簡爲忠義都尉以旌殊行

王朗集爲大理上主簿趙郡張登昔爲本縣主簿值黑山賊圍郡與縣長王雋往救雋殆見害登手格賊以全

雋命又守長夏逸爲督郵所枉登受考掠理逸罪宜加顯異黃初初以登爲太官令

華歆傳三府議舉孝廉本以德行不復限以試經歆以爲喪亂以來六籍墮廢當務存立今聽孝廉不以經試恐學業從此而廢若有秀異可特徵用帝從其言

傅子曰河南尹內掌帝都外統京畿郡有七百吏河南俗黨五官掾功曹典選職皆授其本國人無用異邦人者叡各舉其良而對用之官曹分職而後以次考校之高堂隆傳遷陳留太守犢民酉牧年七十餘有至行舉

為計曹掾帝嘉之特除郎中以顯焉

呂虔傳為泰山太守令舉茂才加騎都尉如故

明帝時何曾上疏曰臣聞諸郡守有年者或疾病皆委

政丞掾不恤庶事或體性疏忽不以政理為意在官積

年惠澤不加於人然於考課之限罪亦不至誥免故得

經延歲月而無斥罷之期以為可密詔主者使隱核參

訪郡守其有疾病不親人物及好脩人事煩撓百姓者

皆可徵還為更選代晉書本傳

諸葛誕為吏部人有所屬託輒顯其言而承用之後

有當否則公議其得失以為褒貶自是羣僚莫不舉

慎所舉冊府

賈詡為尚書典選舉多選舊名以為令僕論者以此

多詡同上

何晏為尚書主選舉其宿與之有舊者多被拔擢

傅子曰漢武舉孝廉秀才歷世相承皆向郡國稱故

吏 又曰末世乃有釋親而恤同歲云同登之歲記

于素帛垂之後屠取此意也北堂書鈔

諸葛亮秉政懲惡舉善量材授任不計資敘時犍為郡守李嚴以

楊洪為功曹嚴未去郡而洪已為蜀郡守洪門下書佐何祇有才策洪未去郡而祇已為廣漢郡守後李嚴廖

立皆得罪或廢或徙聞亮卒垂泣發疾以外

桓温言諸葛相蜀簡才併官晉書

時蜀國州書佐望與郡功曹參選而從事作臺郎特重

察舉雖位經朝要還為秀孝亦為郡端右華陽國志

吳

孫吳以選曹尚書主選舉吳郡暨豔性峭刻好清議為

尚書以郎署混淆多非其人欲激濁揚清別其善否乃

覈選三署皆貶高就下降損數等其居位貪婪志節卑

汙者皆以為軍校置之營府於是怨聲囂然競言豔用

私情虧公法坐自殺

赤烏二年正月詔曰郎吏者宿衛之臣古之命士也閒

者所用頗非其人自今選三署皆以四科不得以虛辭

相飾

永安元年詔案古置學官立五經博士核取應選加其

寵祿科見吏之中及將吏子孫有志好者各立就業課

試差其品第加以位賞

四年遣光祿大夫周奕石偉巡行風俗察將吏清濁民
所疾苦爲黜陟之詔

步騭傳太子登駐武昌愛人好善於是條在荊州界者
諸葛瑾陸遜朱然程普潘濬裴元夏侯承衛旌李肅周
條石幹十一人甄別行狀

吳書曰肅薦述後進題目品藻曲有條貫權擢以爲選舉號稱得才

吳書曰權嘉遜功欲殊顯之雖爲列侯猶欲令厯本州
舉命使揚州牧就辟別駕從事舉茂才

會稽典錄謝淵雖在軍旅垂意人物駱統子秀被門庭

之謗衆論狐疑莫能證明淵聞歎息秀卒見明無復瑕
玷終爲顯士淵之力也

顧邵傳爲豫章太守小吏資質佳者輒令就學擇其先
進擢置右職舉善以教風化大行

三國會要卷十六終

黃巖楊晨纂

三國會要卷十七

黃巖楊晨纂

兵制

魏武軍令吾將士無張弓弩於軍中其隨大軍行欲調
 試弓弩者得張之不得著箭犯者鞭二百沒入吏不得
 於軍中屠殺賣之犯令沒所賣及都督不糾白杖五十
 始出營豎矛戟舒幡旗鳴鼓行三里辟矛戟結幡旗止
 鼓將至營舒幡旗鳴鼓至營訖復結幡旗止鼓違令者
 髡翦以徇軍行不得斫伐田中五果桑柘棘棗
 令曰孤所以能常以少兵敵衆者常念增戰士忽餘事

三國會要 卷一十七
是以往者有鼓吹而使步行爲戰士愛馬也不樂多署
吏爲戰士愛糧也
軍令諸督軍各作幡號若當別遣有所督追寇賊及逃
亾以行道與諸葛亮兵會遇而疑之遠一人以幡後交
後夜者常各屯主相去二百步外鑽火省幡號也
船戰令曰雷鼓一通吏士皆嚴再通什伍皆就船整持
櫓棹戰士各持兵器就船各當其所幢幡旗鼓各隨將
所載船鼓三通鳴大小戰船以次發左不得至右右不
得至左前後不得處違令者斬

水軍發輒先遣人持幡於前監所當營火之處水邊岸
上船若夜到者又然炬火船至見幡火以次泊也
步戰令曰嚴鼓一通步騎悉裝再通騎上馬步結屯三
通以次出之隨幡所指住者結屯住幡後聞急鼓音整
陳斥候者視地形廣狹從四角而立表制戰陳之宜諸
部曲各自按部陳兵疏數兵曹舉白不如令者斬兵若
欲作陳對敵營先白表乃引兵就表而陳臨陳皆無謹
譁明聽鼓音旗幡麾前則前麾後則後麾左則左麾右
則右不聞令而擅前後左右者斬伍中有不進者伍長

殺之伍長有不進者什長殺之什長有不進者都伯殺之督戰部曲將拔刃在後察違令不進者斬之一部受敵餘部不進救者斬臨戰兵弩不可離陳離陳伍長什長不舉發與同罪無將軍令妄行陳閒者斬臨戰陳騎皆當在軍兩頭前陷陳陳騎次之遊騎在後違令髡鞭二百兵進退入陳間者斬若步騎與賊對陳臨時見地勢便欲使騎獨進討賊者聞三鼓音騎從兩頭進戰視麾所指聞三金音還此但謂獨進戰時也其步騎大戰進退自如法吏士向陳騎馳馬者斬吏士有妄呼大聲

者斬追賊不得獨在前在後犯令者罰金四兩士將戰不得取牛馬衣物犯令者斬進戰士各隨其號不隨號者雖有功不賞進戰後兵出前前兵出後雖有功不賞臨陳牙門將騎督明受都令諸部曲都督將吏士各戰時校督部曲督住陳後察凡違令畏懦者有急聞雷鼓音絕後六音嚴畢白辦便出卒逃歸斬之一日家人弗捕執及不言於吏盡與同罪

軍令曰金鼓幢麾隆衝皆以立秋日祠先祠一日主者請奉祠若出征有所克獲還亦祠向敵祠血於鍾鼓秋

祠及克獲還不血鍾鼓祝文某官使主者某敢告隆衝
 金鼓幢麾夫軍武之器所以正不義為民除也謹以立
 秋之日絜牲黍稷旨酒而敬薦之 又曰常以己丑日
 祠牛馬先祝文曰某月己丑某甲敢告牛馬先馬者用
 兵之道牛者軍農之用謹絜牲黍稷旨酒敬而薦之
 又曰軍行濟河主者常先沈白璧文曰某王使某敢告
 於河賤臣某甲作亂天子使某帥眾濟河征討醜類故
 以璧沈惟爾有神裁之
 魏武新書攻車七十五人守車一隊共二十五人通考

太祖行軍大較依孫吳之法而因事設奇自作兵書

十餘萬言諸將征伐皆以新書從事李衛公問對孫子十家註並引

曹公新書玉海抄集諸家兵法名曰接要曹植賦云引魏武新書 奇接孫吳之要隋志兵書接要十卷唐志作捷要魏武帝兵法一卷又注孫子十三篇今存 魏略

吉茂為武德侯庶子先是科禁內學及兵書而茂皆有匿不送官王昶著兵書十餘篇言奇正之用青龍中奏之

黃初三年孫權破劉備於夷陵初帝聞備兵東下樹柵連營七百餘里謂羣臣曰備不曉兵豈有七百里營可

以拒敵者乎苞原險阻而為軍者為敵所擒此兵忌也
 孫權上事今至矣後十日破備書到
 七年八月孫權攻江夏太守文聘堅守朝議發兵救之
 帝曰權習水戰所以敢下船陸攻者幾掩不備也今已
 與聘相持夫攻守執倍終不敢久也

青龍元年保塞鮮卑大人步度根與叛鮮卑大人軻比
 能私通并州刺史畢軌表輒出軍以外威比能內鎮步
 度根帝省表曰步度根以為比能所誘有自疑心今軌
 出軍適使二部驚合為一何所威鎮乎促敕軌以出軍

者慎勿越塞過句注也比詔書到軌以進軍屯陰館二
 將戰沒步度根部落叛出塞與比能合寇邊
 二年諸葛亮出斜谷屯渭南司馬宣王率諸軍拒之詔
 宣王但堅壁拒守以挫其鋒彼進不得志退無與戰久
 停則糧盡虜略無所獲則走矣走則追之以逸待勞全
 勝之道也

時諸葛亮數挑戰遣辛毗杖節為軍師以制之

五月孫權入居巢湖口向合肥新城又遣將入淮沔滿
 寵欲拔新城守致賊壽春帝不聽曰先帝東置合肥南
 守襄陽西固祁山賊來輒破於三城之下者地有所必

爭也縱權攻新城必不能拔敕諸將堅守吾自往征之
七月親御龍舟東征未至權走羣臣以爲可西幸長安
帝曰權走亮膽破大將軍制之吾無憂矣宣王與亮相
持連圍積日亮數挑戰堅壘不應會亮卒軍退

景初二年蜀陰平太守廖惇攻守善羌侯若葦營雍州
刺史郭淮遣廣魏太守王贊南安太守游奕將兵討惇
淮上書贊奕等分兵夾山東西圍落賊表破在旦夕帝
曰兵勢惡離促詔淮敕奕諸別營非要處者還令據便
地詔敕未到奕軍爲惇所破贊爲流矢所中死

帝議遣宣王討公孫淵發卒四萬人議臣皆以爲兵多
役費難供帝曰四千里征伐雖云用奇亦當任力不當
稍計役費及至遼東霖雨不得時攻羣臣或以爲淵未
可卒破宜詔宣王還帝曰司馬懿臨危制變擒淵可計
日待也卒皆如所策

宣帝伐遼東何曾上疏以爲宜選大臣名將威重宿著
者成其禮秩遣詣北軍進同謀略退爲副佐雖萬一不
虞之變軍主有儲則無患矣帝不從

晉書何曾傳裴注
引母邱儉志記云

時以儉
爲副

蜀

諸葛亮兵要云

本集兵要一篇軍令上中下三篇隋志兵法五卷中興書目將苑一卷軍

已近敵羅落常平明以先發絕軍前十里內各按左右下道亦十里之內數里之外五人爲部持一白幡登高外向明看隱蔽之處軍至轉尋高而前第一見賊轉語後第三第二詣主者白之凡候見賊百人以下但舉幡指百人以上便舉幡大呼主者遣疾馬往察視之

兵要曰凡軍行營壘先使腹心及鄉導前覘審知各令候吏先行定得營地擘五軍分數立四表候視然後移營又先使候騎前行持五色旗見溝坑揭黃衢路揭白水澗揭黑林藪揭青野火揭赤以本鼓應之立旗鼓令相聞見若渡水踰山深邃林藪精驍勇騎搜索數里無聲四周絕迹高山樹頂令人遠視精兵四向要處防禦然後分兵前後以爲鎮拓乃令輜重老少次步後馬切在整齊防敵至人馬無聲不失行列險地狹徑亦以部曲鱗次或須環回旋轉以後爲前以左爲右行則魚貫立則雁行前止處游騎精銳四向散列而立各依本方下營一人一步隨師多少咸表十二辰豎六輪長二丈

八尺審子午卯酉地勿邪僻以朱雀於豎午地白獸於豎酉地元武於豎子地青龍於豎卯地招搖於豎中央其樵采牧飲不得出表外也

武侯兵法曰軍有七禁一曰輕二曰慢三曰盜四曰欺五曰背六曰亂七曰誤此治軍之禁也若期會不到聞鼓不行乘寬自留迴避務止初近而後遠喚名而不應軍甲不具兵器不備此謂輕軍有此者斬之受令不傳傳之不審以惑吏士金鼓不聞旌旗不覩此謂慢軍有此者斬之食不廩糧軍不部兵賦賜不均阿私所親取非其物借

貸不還奪人頭首以獲功名此謂盜軍有此者斬之若變易

姓名衣服不鮮金鼓不具兵刃不磨器仗不堅矢不著

羽弓弩不弦主者吏士法令不從此謂欺軍有此者斬之聞

鼓不行叩金不止按旗不伏舉旗不起指麾不隨避前

在後縱發亂行折兵弩之勢却退不鬪或左或右扶傷

舉死因託歸還此謂背軍有此者斬之出軍行將士卒爭先

紛紛擾擾車騎相連咽塞道路後不得前呼喚喧譁無

所聽聞失行亂次兵刃中傷長將不理上下縱橫此謂

亂軍有此者斬之屯營所止問其鄉里親近相隨共食相保

呼召不得越入地位于誤次第不可呵止度營出入不由門戶不自啟白奸邪所起知者不告罪同一等合人飲食阿私所愛大言驚語疑惑吏士此謂誤軍有此者斬之山林之戰不仰其高水上之戰不逆其流草上之戰不涉其深平地之戰不逆其虛此兵之利也故戰鬪之利唯氣與形也

軍令曰敵以來進持鹿角兵悉却在連衝後敵已附鹿角裏兵但得進踞以矛戟刺之不得起住起住妨弩按北堂書鈔上有連衝之陣似狹而厚令騎不得與相離遠十六字末句作起住防弩壞

始出營豎矛戟舒旛旗鳴鼓三里辟矛戟結旛旗鳴鼓角未至營三里復豎矛戟旛旗鳴鼓角復結旛旗止鼓

角違令者髡書鈔按此與御覽引魏武令同

聞五鼓音舉黃白兩半幡合旗為三面圓陣書鈔御覽

限三部司馬皆限力舉二百斤以上前驅司馬取便大戟由基司馬取能挽一石七斛以上弓兩頭進戰視麾所止聞三金音止二金音還御覽

軍列營步騎士以下著兜鍪帳下及右陣各持彭排同上軍行人將一斗乾飯不得持烏育及幔餘大車乘帳幔

什光耀日往就與會矣

初至宿時所便遣四出伺候望訖乃遣樵採皆當在白
幡裏若去營數里草足供人馬幡在數里之表隨樵採
為遠近之宜

四出樵採若後蒲受敵不決者低幡鳴卅鼓二箱倒行
還以解解已如初也

教曰若賊騎來至徒行以戰者陟嶺不便宜以車蒙陣
而待之地狹者以鋸齒而待之

亮在祁山旌旗利器守在險要十二更下在者八萬

以上見御覽
書鈔有誤字

何焯曰呂伯恭云古人用兵不盡用之蜀之大其兵
不過十二萬孔明所用八萬常留四萬以為更代蜀
所以強者以孔明不盡用之及蜀亾尚有十萬二千
數年之間所折不過二萬耳

造八陣圖於魚腹平沙之上壘石為八行行相去二丈

桓温謂此常山蛇勢也

晉書桓温傳水經
注引荆州記略同

益州記土城四門中起六十四魁八八為行魁方一

丈高三尺

薛季宣浪語集八陣圖三一沔陽高平舊
壘一新都八陣鄉一魚腹江灘水上圖

吳

孫權作黃龍大牙常在中軍進退視其所向

胡綜傳賦曰乃律天時制為神軍取象太乙五將三門四靈既布黃龍處中

周制日月實曰太常桀然特立六軍所望仙人在上鑒觀四方

兵政

建安七年令曰其舉義兵以來將士絕無後者求其親

戚以後之授田給耕牛置學師以教之為存者立廟使

祀其先人

衛臻父茲從討董卓戰於太祖每涉郡境輒遣使祠又南征臨清水祠亾將士

八年令曰司馬法將軍外綏故趙括之母乞不坐括是古之將者軍破於外而家受罪於內也自命將征行但

賞功而不罰罪非國典也其令諸將出征敗軍者抵罪

失利者免官爵

魏書載庚申令曰議者或以軍吏雖功能德行不足

堪任郡國之選所謂可與適道未可與權治平尚德

行有事賞功能論者之言一似管窺虎歟

十二年春令定功行封大封功臣二十餘人皆為列侯

餘各以次受封及復外事之孤輕重各有差 又令分

所受租與諸將掾屬及故戍者

十四年令外者家無基業不能自存者縣官勿絕廩長

吏存恤撫循

二十年冬始置名號侯至五大夫與舊列侯關內侯凡

六等以賞軍功魏書曰置名號侯爵十八級關中侯爵

級銅印龜紐墨綬五大夫十五級銅印環紐亦墨綬皆不食租與舊列侯關內侯凡六等

延康元年令士卒死於者郡國給棺槨殯斂送至其家

官為設祭

黃初六年詔曰吾當征賊欲守之積年其以陳羣為鎮

軍大將軍司馬懿為撫軍大將軍若吾臨江授諸將方

略則撫軍當留許昌督後諸軍錄後臺文書事鎮軍隨

車駕當董率眾軍錄行尚書皆假節鼓吹給中軍兵騎

六百人

七年八月孫權攻江夏先時遣書侍御史荀禹慰勞邊

方禹發所經縣兵及所從步騎千人乘山舉火權退走

嘉平五年詔曰故中郎郭修勇過聶政功逾介子其追

封為樂鄉侯食邑千戶謚曰威侯子襲爵加拜奉車都

尉賜銀千餅絹千疋以光寵存亾永垂來世

六年詔曰劉整鄭像越蹈重圍臨難不顧追賜爵關中

侯各除士名使子襲爵如部曲將死事科

三國會要 卷一十
正元二年十月詔曰洮西將士或沒命戰場或流離異域令所在郡典農及安撫夷二護軍各部大吏尉郵其門戶無差賦役一年其力戰殞事者皆如舊科十一月又詔征西安西將軍各令部人於戰處及水次鉤求屍喪收斂藏埋以尉存亾

甘露元年大破蜀將姜維於上邽遣使犒賜將士大會臨饗飲宴終日

二年詔曰諸葛誕造構逆亂迫脅忠義平寇將軍臨渭亭侯龐會騎督偏將軍路蕃各將左右斬門突出忠壯

勇烈所宜加異其進會爵鄉侯蕃封亭侯八月詔曰諸葛誕創造凶亂主薄宣隆部曲督秦絜秉節守義臨事固爭爲誕所殺其以隆絜子爲騎都尉加以贈賜光示遠近以殊忠義

詔曰昔南陽郡山賊欲劫質故太守東里袞功曹應余獨身捍袞遂免於難余顛沛殞歟殺身濟君其下司徒署余孫倫吏使蒙伏節之報

魏略太祖聞之嗟嘆下荆州復表門閭賜穀千斛

夏侯惇傳呂布遣將僞降其執持之責以寶貨軍中震恐惇將韓浩乃勒兵屯營門召軍吏諸將皆案甲

當部不得動諸營乃定遂指惇所叱持質者曰汝等凶逆乃執持大將軍吾受命討賊甯能以一將軍之故縱汝乎因泣謂惇曰當奈國法何促召兵擊持質者遑遽叩頭言我但乞資用去耳浩數責皆斬之惇既免太祖聞之謂可爲萬世法乃著令今後有持質者皆當并擊勿顧質由是劫質者遂絕

咸熙元年詔夏侯和朱撫賈輔羊琇皆抗節不撓拒會凶言宜加顯寵以彰忠義其進和輔爵爲鄉侯琇撫爵關內侯王起爲部曲將

二年以虎賁張修昔言鍾會反逆以致沒身賜修弟倚爵關內侯

魏略郭憲西平人韓約失衆往依之後从田樂楊逵等就斬約頭送憲不肯署名太祖宿聞憲名視條疏怪憲不在中間逵以情對數其至義乃表列與逵等並賜爵關內侯

蜀諸葛亮上表曰永昌郡吏呂凱府丞王伉等執忠絕域十有餘年雍闓高定偪其東北而凱等守義不與交通以凱爲雲南太守封陽遷亭侯王伉亦封亭侯爲永

昌太守

龐統傳統為流矢所中卒拜其父議郎遷諫議大夫

舟師

建安十三年作元武池肄舟師

水經注云在鄴

十四年軍至譙作輕舟治水軍

黃初五年八月為水軍親御龍舟

杜畿傳云御樓船於陶河試船

景初元年公孫淵自立為燕王詔青兗幽冀四州大作

海船二年正月詔司馬宣王帥眾討遼東

魏略孫權乘大船來觀軍曹公使弓弩亂發箭著其船

船偏重將覆因迴船復以一面受箭箭均船平乃還

江表傳曰孫權乘飛雲大船飛雲蓋海吳樓船之有名

者皆雕鏤彩畫有軒橫華檻之船也

文選吳都賦注

孫權裝大船名曰長安亦曰大舸載坐直之士三千人

與羣臣泛舟江津值風起欲西取蘆洲谷利不從拔刀

急上令取樊口船至岸而敗

水經江水注

江表傳周瑜拒操于赤壁黃蓋取蒙衝鬪艦載荻柴灌

油裹以帷幕詐云欲降時東南風急去北軍二里同時

發火火烈風猛燒及岸上營落烟炎張天雷鼓大震北

軍大壞

雜錄

曹瞞傳操與馬超隔渭水地多沙不可築城婁子伯說
今寒可起沙為城以水灌之一夕而成操乃多作縑囊
堙水夜汲作城比明城立

水經注

武備志諸將問曰初賊守潼關渭北道缺不從河東擊
馮翊而反守潼關積日而後北渡何也曹操曰若吾入
河東賊必守諸津則西河未可渡吾故盛兵向潼關使
賊悉衆南守而西河之備虛故二將得西河然後引軍

北渡賊不與我爭連車樹柵為甬道而南既為不可勝
且以示弱渡渭且堅壘虜至不出所以驕之也故賊不
為營壘而求割地吾順言許之使不為備固蓄士卒之
力一旦擊之所謂疾雷不及掩耳兵之變化固非一道
魏武奏事邊有警輒露版插羽以檄急之意也

文選注

太祖與袁紹官渡合戰軍不利復壁紹為高櫓起土山
射營中營中皆蒙楯衆大懼太祖乃為發石車擊紹樓
皆破紹衆號為霹靂車

曹公出軍令無敗麥犯者舂騎皆下馬持麥相待公馬

騰入麥中敕主爵議罰對曰春秋罰不加尊公曰作法自犯何以率下然孤為軍主不可殺請自刑拔劍割髮置地

劉馥傳子靖為鎮北將軍以為經常之大法莫善於守防使民夷有別遂開拓邊守屯據險要

王觀傳為涿郡太守北接鮮卑數有寇盜觀令邊民凡十家以上屯居築京候或有不願者觀乃假遣朝吏使歸助子弟不與朝會但敕事訖各還於是吏民相率不督自勸旬日俱成守禦有備寇鈔以息

王基傳母邱儉作亂基曰宜速進兵聞拙速未覩工遲議者多欲將軍持重持重非不行之謂進而不可犯耳

今據堅城保壁壘以積實資虜

謂邸閣積糧

縣運軍糧甚非

計也諸葛誕反吳遣朱異來救基被詔引諸軍據北山遂守便宜上疏曰今與賊對當不動如山若遷移依險人心搖蕩於執大損諸軍並據深溝高壘衆心皆定不可傾動此御兵之要也報聽

曹仁傳從圍壺關太祖令曰城拔皆坑之連月不下仁言於太祖曰圍城必示之活門所以開其生路也今公

告之必外將人自為守且城固而糧多攻之則士卒傷守之則引日久非長計也從之城降

曹洪傳陳溫素與洪善洪將家兵千餘人就溫募兵

任傳別收宗族及賓客家兵數百人

魏略太祖為司空時以已率下每歲發調使本縣平貲於時譙令平洪貲財與公家等太祖曰我家貲那得如

子廉耶

曹真傳每征行與將士同勞苦軍賞不足輒以家財頒

賜士卒皆願為用

孫禮傳為揚州刺史與吳全琮戰賊退詔賜絹七百匹

禮為亾者設祭哀臨以絹付亾者家無入己者

魏略諸葛亮攻郝昭於陳倉以雲梯衝車臨城昭以火

箭射之雲梯盡然人皆燒死又以繩連石磨壓衝車折

亮乃為井闌百尺以射城中以土瓦填塹欲攀城昭於

內築重牆又為地突欲涌出城裏昭於內穿地橫截之

國淵傳破賊文書舊以一為十及淵上首級如其實數

司馬芝傳差劉節客王同等為兵掾史白節家前後未

給繇芝不聽兵已集郡而節藏同等因令督郵以軍興

詭責縣掾史乞代同行太守即以節代同

于禁傳諸將以昌豨已降當送禁曰不知公常令乎圍

而後降者不赦後文帝使賈信討田銀等賊請降議如舊法程昱曰誅降者謂在擾攘之時故

以示威天下略定必降之賊殺之無所威懼太祖果不誅

魏略青龍中司馬宣王在長安立軍市軍中吏士多侮

侵吏民顏斐白宣王怒召軍市候便於斐前杖一百潘璋

傳征伐止頓便立軍市他軍皆仰取足

劉劭傳青龍中吳圍合肥時東方吏士皆分休征東將

軍滿寵表請中軍兵并召分休將士集擊之

鮑勛傳為魏郡西部都尉郡界休兵有失期者免官

陳泰傳泰每以一方有事輒虛聲擾動天下故希簡白

上事驛書不過六百里司馬文王語荀顛曰元伯沈勇

能斷荷方伯之重救將陷之城而不求益兵又希簡上

事必能辨賊故也都督大將不當爾邪

母邱儉傳句驪王宮奔買溝追之過沃沮千餘里至肅

慎氏南界刻石紀功刊丸都之山銘不耐之城

魏制諸將出征鎮守方面皆留質任於內通鑑注邵悌言鍾會伐蜀

單身無任

晉書司馬孚傳以為擒敵制勝宜有備預每諸葛亮入關中邊兵不能制敵中軍奔赴不及事機宜選步騎二萬以為二部為討賊之備

鄧艾伐蜀募取涼州兵馬羌胡健兒許以重報後五千

餘人功皆第一

晉書段灼傳

晉王渾表云昔伐蜀有小功斬牙門數人便加鼓吹袁子鄧艾以萬人入江由之險鍾會以二十萬眾留劔閣而不得進三軍之士已饑使劉禪數日不降者二將之軍難以反矣

蜀

趙雲別傳街亭兵退有軍資餘絹亮使分賜將士雲曰軍事無利何為有賜其物請悉入赤岸府庫須十月為冬賜亮善之

呂乂傳遷巴西太守丞相亮連年出軍調發諸郡多不相救乂募取兵五千人詣亮慰喻檢制無逃竄者徙為漢中太守兼領督農供繼軍糧

姜維傳初先主留魏延鎮漢中皆實兵諸圍以禦外敵敵若來攻使不得入及興勢之役王平拒曹爽皆承此

制維建議以為錯守諸圍雖合周易重門之義然適可禦敵不獲大利不若使聞敵至諸圍皆歛兵聚穀退就漢樂二城使敵不得入平且重關鎮守以捍之有事之日令游軍並進以伺其虛敵攻關不克野無散穀千里縣糧自然疲乏引退之日然後諸城並出與游軍并力搏之此殄敵之術也於是令督漢中胡濟卻住漢壽監軍王含守樂城護軍蔣斌守漢城又於西安建威武衛石門武城建昌臨遠皆立圍守
華陽國志涪陵郡蜀丞相亮發其勁卒三千人為連弩

士遂移家漢中鄧芝移其豪徐蘭謝范五千家於蜀為獵射官 又云移南中勁卒青羌萬餘家於蜀為五部置五部都尉分其羸弱配大姓為部曲

蜀有叟兵 後漢書注以叟兵為蜀兵按書收晉孔傳云蜀叟華陽國志武都郡有麻田氏叟據方言 俛即叟也又曰大種曰昆小種曰叟皆曲 帳下白毘 頭木耳環鐵裹結諸葛亮奏有寶叟青羌 中虎步兵 姜維傳又糜竺傳有虎 騎監水經注有虎步兵

吳

太平二年科兵子弟年十八已下十五以上得三千餘人選大將子弟年少有勇力者為之將帥亮曰吾立此

三國會要 卷十七
軍欲與俱長日於苑中習焉

永安元年詔曰諸吏家有五人三人兼重爲役父兄在都子弟給郡縣吏旣出限米軍出又從至於家事無經護者朕甚愍之其有五人三人爲役聽其父兄所欲留爲留一人除其米限軍出不從

六年丞相興建取屯田萬人以爲兵

寶鼎三年九月皓出東關丁奉至合肥

丁奉傳命奉與諸葛靚攻合肥奉與晉大將石苞書構而間之苞以徵還

建衡三年正月晦皓舉大眾出華里皓母及妃妾皆行華覈等固爭乃還

江表傳曰刁元使蜀得司馬徽與劉廙論運命麻敷事元詐增其文曰黃旗紫蓋見於東南終有天下者荆揚之君乎又得降人言壽春下有童謠曰吳天子當上皓聞之喜曰此天命也卽載其母妻子及後宮數千人從牛渚陸道西上云青蓋入洛陽以順天命行遇大雪道塗陷壞兵士被甲持仗百人引一車寒凍殆死皆曰遇敵便當倒戈皓乃還

按吳將帥部曲家屬皆隨營韓當傳子綜將母及家屬部曲男女數千人奔魏注引吳書曰綜呼親戚姑姊悉以嫁將吏所幸婢妾賜與親近而奔魏妃嬪傳徐琨擊張英於當利口琨母時在軍中孫和何姬父爲騎士孫權游幸諸營姬觀於道中吳錄曰孟仁先爲朱據軍吏將母在營夜雨屋漏涕泣謝母朱桓傳部曲萬口妻子盡識之

駱統傳徵賦調數由來積紀民戶浸寡少有丁夫每有徵發羸謹居家重累者先見輸送少有財貨傾居行賂不顧窮盡輕剝者迸入險阻黨就羣惡又民間非小能自供產子多不起養屯田貧兵亦多棄子尤以占募在民間長惡敗俗生離叛之心急宜絕置

陸遜傳會稽丹陽多伏匿乞與募又云部伍東三郡强者爲兵吾粲傳募合人衆與呂岱討平山越張溫傳欲取宿惡以增健兵皆占募也又陸抗傳黃門監官開立占募兵民怨役逋逃入占是孫皓時且令宦官募兵矣

陸抗傳常慮夷兵素不簡練卽夜易夷民皆以舊將充

陸凱傳先帝戰士不給他役使春惟知農秋惟收稻江
 渚有事責以夙效今之戰士供給衆役廩賜不贍孫皓時
 孫韶傳爲鎮北將軍善養士卒得其夙力常以警疆場
 遠斥堠爲先務動靜而爲之備故鮮有負敗青徐汝潁
 頗來歸附淮南濱江屯候皆徹民遠徙徐泗江淮之地
 不居者各數百里
 凌統傳統斫勤夙自拘於軍正權壯其果毅使得以功
 贖罪

吳名宗大族皆有部曲阻兵仗勢足以違命

鄧艾傳

陳武傳表所受賜復人二百家在會稽新安縣

江表傳言復客

二百家蓋客戶役作表武表視其人堪兵乞還官曰枉

此勁銳以爲僮僕以充部伍權嘉之下郡縣料正戶贏

民以補其處甘甯傳注將僮客八百人又曰招亡客及

策又稱親客健兒

吳以草創之國信不堅固邊屯守將皆質其妻子名曰

保質天紀四年注引搜神記俞正燮曰建衡三年注吳

錄曰孟仁遷吳命時皆不得將家之官則孫皓之制草創時不如此步騭韓當傳是邊城之部曲皆有家屬魏州郡長吏及征戍將吏留質京師此司馬氏製法

晉受禪乃除之按孟仁本名宗為吳令喪母奔赴是孫權時事非皓所制也輿地紀勝吳立任子館

吳有解煩敢外兩部又有車下虎士甘甯丹陽青巾孫皓

傳交州義士步騭及健兒凌統武射駱統之名通考

吳時緣江戍圖曰每刺姦屯有五兵賊曹一人皆作烽

火有急以光傳之御覽引烽火以炬置孤山頭皆緣江相望或百里或五十里三十里寇至

則舉一夕行萬里孫權時令暮舉火於西陵鼓三竟達吳郡長沙裴注引庾闡揚都賦注

晉紀魏文帝在廣陵吳人臨江為疑城自石頭至江乘

車以木植衣以葦席加采飾焉徐盛傳言從建業築圍薄落圍上設假樓

呂蒙到南郡約令軍中不得有所求取麾下士汝南人

取民家一笠以覆官鎧蒙以為不可以鄉里故廢法垂

涕斬之於是軍中震慄道不拾遺杜預命賊軍

權使蒙襲關羽於江陵蒙至尋陽盡伏其精兵艣艫中

使白衣搖艣作商賈人服晝夜兼行羽所置江邊屯候

盡收縛之故羽不聞知至江陵遂以城降通考

江表傳權使甘甯為前都督使夜入魏軍甯乃選健兒

百餘徑詣曹公營使拔鹿角踰壘入營斬數十級北軍

驚駭鼓譟舉火如星甯已還作鼓吹稱萬歲

魏武帝令曰作百辟刀五枚曹植賦建安中造寶刀五枚以龍熊鳥雀為識

典論曰造寶刀三日靈寶含章素質又作露陌刀蒲

元為諸葛亮鑄刀淬以蜀江之水因曰神刀御覽

古今注百鍊青犢漏景吳大帝三刀也寶劍六白蛇

紫電辟邪流星青口百里

魏百官名三公拜日賜鷄尾鵲尾箭十二枚 紫

茸題頭高橋鞍一具御覽

魏氏春秋亮損益連弩謂之无戎以鐵為矢長八寸

一弩十矢俱發 典論馬鈞言作之可令加五倍

晉書陶璜傳吳人愛蜀側竹弩

吳麻魏文帝與吳王明光鎧

曹植表先帝賜臣鎧黑光明光各一具兩當鎧一領

鎖鎧一領馬鎧一領

宋王元謨鎮江州明帝賜以諸葛亮箭袖鎧又殷孝祖

諸葛亮集南征賜金鈇鉞魏辛毗仗黃鉞當軍門立

陳琳武庫賦鎧則東胡闕鞏百鍊精剛函師振旅韋

人制縫元羽縹甲灼爚流光弩則幽都筋骨常山廩

幹弓則烏號越棘繇弱角端象弭繡質哲拊文身矢

則申息肅慎箇籥空流焦銅毒鐵斨鏃鳴鏃玉海

